


Igmar Benschop:

UN HOBEN HOPI ACTIVO DEN DIFERENTE DEPORTE CU ASPIRACION DI BIRA POLIS



DESEO PA BIRA POLIS

"Door di mi tata ken tabata polis durante 30 aña y desde chiquito mi a gusta e trabao

cu el a haci, mi a worde estimula pa drenta den e Cuerpo Policial. Aki dos luna mi ta bay inscribi na school di polis pa completa mi testnan pa asina mi por cuminsa cu estudio

pa bira polis. Mi tin amigonan polis y nan ta contami di nan trabao. Den polis bo ta keda activo den deporte, bo ta move hopi, y bo ta siña conoce bo comunidad".

Garrick Oduber:

UN HOBEN POLIFACETICO RIBA TERENO DI DEPORTE

Tambe e kier bira polis!

Seccion Hubentud den Movecion tin dos entrevistado hopi special awe. Ta trata di e hobennan atleta Igmar Benschop y Garrick Oduber, kendenan reciente a realiza un bunita hazaña deportivo riba lama. Pero ademá nan tin otro metanan pa cumpli den futuro cercano. IGMAR BENSCHOP ta alumno di Klas E-1-2 di Colegio Arubano y den futuro e kier bira polis. E ta practica diferente deporte riba loke e mes ta elabora: "Mi a cuminsa cu landamento for di mas of menos mi seis aña di edad. Mi a haya diploma A-B-C-D-. Hunto cu mi famia mi a bay Hulanda, Eindhoven, unda nos a biba 3 aña. Eynan mi a haci atletiek y yudo. Actualmente mi no ta practicando e deportenan aki. Mi a bolbe Aruba unda a cuminsa e practica di Kayak y Diving, tambe Snorkeling y Weight Training. Fuera di esaki ami ta core pa mantene condicion fisico".

KAYAK

Igmar tin mas of menos 4 aña ta practicando Kayak. "Mi a conoce Kenneth Croes door di practica di deporte aquatico, y ami a acerque pa siña e deporte di kayak. Nos ta bay tur parti rond Aruba cu kayak, nos ta bishita e bunita partinan cu e naturaleza di Aruba ta ofrece nos. Durante tur e training di kayak cu mi ta haci mi a yega asina avanza cu mi kier a realiza e hazaña cu a tuma lugar dia 5 di Januari. E meta ta pa concientiza e

hendenan riba e ciudo di nos naturaleza y pa nos hubentud haci mas deporte. E preparacion pa e hazaña aki a tuma nos 3 aña di entrenamiento pa cruza lama, loke no ta facil. Nos mester a cambia nos sistema di alimentacion door di come mas fruta y verdura posible. Menos salimento anochi, drumi tempran, relahamento fisico y mental tambe ta forma parti di e regimen nobo di bida pa realiza e travesia ecologico. E tabata un experiencia hopi grandi cu den futuro nos lo sigui haci e tipo di travesia aki".

E RETO


Apesar cu e meta no a worde cumpli den su totalidad pa un mal comprendimento e reto ta sigui bibo pa nos logre den otro oportunidad. "Nos a yega un total di 45 miya den 13 ora cual ta mas of menos 85 kilometer riba lama. Nos a cuminsa 8'or di anochi te e siguiente dia pa 9.10'or di mainta. Nos ta sinti den e capacidad di logre ya cu nos no a bira malo solamente un poco cansa y den futuro ya nos sa caba kico pa haci pa keda den condicion". Igmar su deseo ta pa den futuro mira mas hoben practica algun deporte. "Deporte ta dunabo bon condicion fisico y mental, ta alehabo di droga y alcohol y pa bo bira un mehor persona den futuro, y ademá ta habri e oportunidad pa bo participa den competencianan internacional y hiba e nomber di pais dilanti".

GARRICK ODUBER a caba MAVO y ta wardando riba contesta di School Policial. E tambe ta un atleta cu a cuminsa cu su siete aña di edad, practicando yudo na Yudo Center y despues el a drenta den e mundo di baseball na su 9 aña di edad, como miembro di Caribe Club den Little League, den cual el a yega di participa den un torneo mundial na Japon, den cual el a sali M.V.P. Despues el a pasa pa Senior Division hungando pa Kentucky Fried Chicken. "Despues mi a pasa pa diferente team den hubenil y dobel A. Tocante e deporte di Kayak mi a drenta den e deporte aki door di Igmar kende a hacimi conoci cu Kenneth Croes, 4 aña pasa. Kayak ta un deporte hopi dificil y ademá e ta un deporte internacional cu ta worde practica rond mundo. Mi tin aspiracion pa algun dia competi den e deporte aki na nivel internacional y ademá, den futuro sigui haciendo hazañanan y incluyendo esun di dia 5 di Januari ultimo".

Garrick actualmente ta activo den "Martial Arts", Snorkeling, landamento, y kayak, y kier sigui cu hazañanan pa estimula mas hoben den deporte. "Deporte ta hibabo na un nivel fisico y mental halto, hunto cu disciplina y responsabilidad".

DESEO PA BIRA POLIS

"Mi ta gusta e trabao cu Cuerpo Policial ta desplega



Bo ta haya hopi experiencia di e bida den comunidad, y bo ta keda activo den deporte. Polis ta nifica seguridad pa un pais pa proteha y sirbi nos comunidad, y mundialmente ta un trabao hopi importante pa e seguridad di e ser humano. Un di mi aspiracionnan ta pa cuminsa na straat dienst pa haya experiencia y despues drenta den tereno di recherche. Mi a pasa e testnan caba, nan a sali bon, y mi ta sperando mi yamada pa drenta school policial".

GRADICIMENTO SPECIAL

Na prome lugar Garrick y Igmar kier duna DIOS danki

pa duna nan e oportunidad pa por a yega na e nivel unda nan ta, y specialmente na Kenneth Croes cu a introduci nan den e deporte di kayak. "Tambe nos kier a gradici e suporting team cual a keda hunto cu nos durante e trayecto y tambe e 3 hobennan balente cu a keda cada ora den contacto cu nos den e lama peligroso y bruto den nan rubber boat. Tambe gradicimento pa e capitan Rafael Kelly y su rumannan kendenan a ofrece nos mes pa yuda nos durante e trayecto. Ademá un palabra di gradicimento pa nos sponsor y nos famianan cu a keda pendiente y dunando nos apoyo moral y confianza".